

四明叢書

張宗祥



樗菴存藁卷三

清鄞縣蔣學鑄聲始撰

費德音墓誌銘

乾隆甲申十一月十六日費德音先生卒次子衍沆狀公事實命其友蔣學鑄爲之銘鑄自惟後輩何敢當此而衍沆衰經踵門者再固以請因不獲辭按狀公諱光琪字德音先世汝南人宋建隆中有諱顗者官慈谿縣尉因家焉後徙邵城凡二支一居永寧菴一居錦帶橋西譜牒闕軼不詳其分合所自居永寧菴者自明洪武

間徙閱五傳爲公曾祖諱應□慈溪學生祖緯禔寧波
府學生父培益字文謙鄞學生初娶某氏繼謝氏無子
立公爲後而公本生居錦帶橋西者萬曆間續徙再傳
諱應宿崇禎癸酉舉人仕至兵馬司指揮使應宿生緯
祥貢生明季以薦授國子監祭酒緯祥生培□字禹郊
娶張氏生子四公其叔也少穎悟讀書輒解大意會禹
郊公卒伯仲皆治舉子業內外事悉諉公因輟學文謙
公擇後時張孺人頗靳之曰吾所仗者此兒耳文謙公
以公爲賢固請乃許未幾文謙公卒哀毀盡禮嗣母謝

孺人性嚴公事之曲得其歡心復時時歸省本生執幹
如舊故兩親一忘所出之子爲人後一忘所後之子非
己出也公性尤愛康熙丙寅伯兄景庭中蜚語制府
檄郡縣密捕之將斃之獄有覘知其事者語景庭景庭
入告母遽跳身走公急攜金追覓同載至省城匿兄族
人所迨歸則當事索景庭不得卽嚴捕公族屬俱避匿
公亦遁伏餘姚之中村旣念二母獨城居竊歸省時邏
者四出踪跡公夜從間道行披榛莽踰澗谷虎跡縱橫
道上俚鬼前後啼公馳弗顧五鼓抵郡西門不敢入遶

城而北城北多賣菜傭公變服代荷擔入市得突過舅氏家坐甫定有健卒十餘人來搜捕公伏閣上僅免乘黑漏省二孺人復逸去再走省城探伯兄則伯兄已變姓名客他所邑公趨訪之夜迷失道又天雨泥滑蹣跚空谷中遙望山崦有燈火光馳詣求宿山中人初疑不納一老嫗出曰此窮客耳夜已半將令何往遂延入炊笋飯公取蕘藉地令公臥次曉酬以金不受擲而行既晤伯兄旅次中勸使遠行歸鬻產托同邑應計偕者俾附舟北上甲午兄捷北闈報至張孺人歎曰非琪兒此

子已瘕死矣公爲人坦夷不設城府遇事挺挺持是非
常面數人過人皆敬憚之里中有嫠婦楊氏爲族屬所
侵侮困不支將改適公叱責諸惡少力護之時贍其乏
婦得守志以老公沒登堂哭奠而夫公生於康熙辛丑
十一月六日年八十六元配宣氏繼□氏子三人衍瀛
衍沆衍沆孫七人曾孫五人葬於鄞西之七港口鏞先
君子與公伯兄爲文字交時述公舊事故鏞幼聞孝廉
公有弟嘗脫兄於難及與衍沆交乃知卽公也嗚呼是
足以銘矣

銘曰疇無同體急難救護疇知同體利害瞻顧惟公至性敦不渝平生長者行有餘我取其大爲特書

李雪坪墓誌銘

予性癖不能詭隨里中人皆惡而遠之平時往還無問者惟同學張望槎後更得吾妹婿李君雪坪望槎之癖也過於予人之惡而遠之也亦甚於予君則少以文學名於鄉後遊史雪汀全謝山之門二公稱爲讀書種子士之好古者爭相就質問而附影逐響之輩亦或慕而與之交予初過之客座恆滿子亟避而之內室妹使人

呼君就語語畢卽歸久之察君之外和而內介也始數
數過從予嘗欲介君以交於望槎望槎難之會學使者
翠庭雷公按部將詣學諸生候者皆錯立族談予與望
槎獨寂對西廡下久之君至就予坐則環而向者如堵
望槎去之他所雷公雅聞君名試時降體貌與款語揭
案署君第一數召見君不時赴雷公者愒廬先生之子
而侍郎蔡聞之之高弟也閩人言理學者推安溪李文
得而後一人其傾倒君甚至而君遇之落落然予詰之
饑曰病不任趨走耳予曰然則何以能入試君笑曰此

卽古人往役之義也然雷公卒以此愈重君舉君優行
貢太學丙子秋君赴省試適雷公以養親告歸君往送
是時自督撫以下傾城出餞郡縣吏名刺猶壅遏不及
通雷公遙望見君卽降座握手立交衢中語移時鄭重
而別見者皆驚顧次日大吏有遣人至寓物色君者君
遽束裝行望槎聞而謂子曰吾知有子而不知李君真
葉公之好龍也君諱立櫃字又泉雪坪其號世爲鄞右
族六世祖諱堂明工部侍郎著有四明文獻錄及選錄
邑先正詩曰四明羣雅學者稱羣山先生高祖諱康先

明禮部尙書以忤魏忠賢褫職莊烈帝召復故官復以忤閣臣溫體仁罷歸曾祖振璣魯監國時以尙書恩授前軍都督府都事與兄廷璣奔走海上廷璣下獄都事百計出之竟鬱鬱死黃梨洲誌其墓祖某父清臣諸生母馬氏君幼孤力學所讀書一過卽成誦嘗假謝山讀史通表踰再旬卽還之謝山訝其速叩以與諸史及萬季野歷代史表異同君一一舉似無遺乃大爲歎賞諸百氏書悉能貫串以此名噪一時竟以勤苦太過得怔忡疾吾妹再刲股以療卒不起生於康熙壬寅六月二

十六日卒於乾隆丁丑十一月二十一日年止三十有五初娶邱氏早卒繼室以吾妹無子族屬凋落以序無可繼者立同姓子光臨爲後葬於鄆城之南去其先世大墓不半里君沒後數年望槨亦以心疾墮水卒子索居無聊獨徙倚門外或獨步河隄間望暝色而歸蓋自是漠然無所向矣

銘曰不子子以處仍蹇蹇以行是謂幽人之貞

君以家譜太略嘗欲補作高曾傳未及爲而卒故子敘其先世加詳焉亦君之志也

盧月船墓誌銘

吾友月船沒其子灋乞予爲銘予惟古人有云人必相及也而後能相知必相知也而後能相爲言予自揣所學不足以逮君謝不敢爲而灋以君舊時同志僅予在固請不已不獲辭君姓盧氏諱鎬字配京別字月船浙之寧波府鄞縣人先世自東陽遷定海之金塘明嘉靖間始徙居郡城小江里曾祖諱章祖諱德周父諱培字春亭曾祖妣錢氏祖妣周氏徐氏妣陳氏君少奇穎未冠補諸生試輒冠其曹然不欲以經生業自限從師取

友其學凡三變而卒底於大成初偕同邑楊爾音遊好
搜討僻書軼事未幾棄去從前輩史雪汀研究經史爲
根柢之學既猶嫌其未博介其友執贄謝山先生門下
因得盡讀所藏書先生歲出遊時邗上馬氏聚書樓武
林趙氏小山堂牙籤甲天下每借其祕本捆載以歸諸
門下聞先生至競集分攜數十種而去閱畢彼此互易
而君最精銳目五行下日可畢十餘卷識解尤超絕一
覽卽能穿穴其間先生目爲高第弟子其後君南遊金
陵北抵都下所至必訪求經史遺佚及宋元人文集之

未甚流布者遂涵茹一切癸酉登賢書赴南宮試秦尙
書蕙田王學士西莊號稱博雅一見卽以畏友待之禮
闡分校者各爭欲得君而卒不售公車凡十上選授平
陽教諭君以父年高不欲就春亭公強之不得已之官
久之將陳情而春亭公之訃至奔歸自以爲大恨日戚
戚因得疾服闋方補授而已不起生於雍正癸卯十月
某日卒於乾隆乙巳四月某日年六十有三葬某鄉之
某原所著詩曰南北遊草寂吟草初娶張氏繼娶董氏
馬氏子四禮其長也次渭先君卒次沂次泗禮泗皆諸

生女三長適知饒平縣黃定文次適范上卿次適洪德
錦子初侍謝山先生講坐卽肩隨君間與考證今古君
止就子所論相往復不及其他先生沒君留京師累年
子獨就郡中儲藏家蒐覽古籍君歸以新得相叩則君
無弗淹貫予以君所交皆通人又京師積書之林其聞
見非子可比迨君赴學博任平陽僻陋少學者行篋所
攜書不能多而鄉中後進多好購異書吳中書估歲必
再三至凡子聞而未見之書居十之二三因得窮十年
力沈酣其中後因君讀禮家居一一舉似而君就諸書

之同異得失與子剖證予不禁爽然蓋君爲人蘊藉不欲矜予以所不知前後傾吐皆隨問隨答其中之所有子迄不能測也君生平不輕著書所作詩文亦懶於收拾今所存僅一斑獨其學冠絕同輩而子舛陋不足相發明然卽予之所不能測者而君之學亦概可見矣
銘曰不事表襮宜所造之邃也無多撰著慮其名之晦也河汾弟子君其最也予不足以盡君後有知者信師傳之弗愧也

屠夢墟墓表

屠君夢墟卒之次年卜吉將葬其子繼聲舊從予遊請於予曰知吾父者莫先生若乞爲文表於墓昔予兄莪野與君兄雁湖爲莫逆交子肩隨君亦數十年凡君門內之行久相歎服雖微繼聲請自不可無述嗚呼史言晏子祿入潤及九族在古人亦若以爲不易得者而特稱之然彼固居位有食采者耳君以一寒士而上奉嚴親旁逮內外戚屬拮据者終其身可不謂尤難歟君諱可播字嘉穀一字法田又號夢墟其上世詳予所作雁湖狀父蘇亭公諱某庶母周氏兄弟四人長兄早世次